



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

## 2. Kalenderwoche – ab 10. Januar 2009

# Mei Horrorgob

Das neue Jahr is das Jahr des Dieschors! In Schiena! Bei uns solls ja noch das Jahr dor Griese sein.

Haubdsäschlich de Auswirkungen offm Arbeitsmargd solln ziehmlich schlimm wern. Bloß de Benkor in de Bankn hamm schon alles iborschdandn. Dähnen dud schon widdor das Geld nur so in de Daschn fließn. Die machn Gewinne ibor Gewinne. Wie zerronnen so gewonnen! - so heeßd das bei die! Bei unsoreim isses ehör umgedreht - wie gewonnen so zerronnen!

Wobei - bei unsoreim dud ja ooch das zorrinnen, was mir gahr nisch gewonnen ham. Es dud ooch das zorrinnen, was mor sisch zusammgeschbard had. Es scheid beinahe so zu sein, als wie wenn dei Geld um so schnellor zorrinnen dud, je wenischor es is. Das is wie midm Eis in Greenland odor am Nordbohl. Je wenischor ibrisch is, desdo schnellor isses ganz weg!

Nee, da du isch dähm neun Jahr nisch sähr obdemisdisch endgeeschn guggn. Ehor e bißl schgebbsch! Wobei allordings mei bersehnliches Horrorgob fiehrs neue Jahr sähr gud aussähn dud. Isch bin ja reeschlreschd baff gewähns, wo ischs gelähsn hab. Isch bin Fisch. Un das Horrorgob fiehr de Fische im neun Jahr, das dud sisch lähsn, als wie wens nisch fiehr de Fische, sondorn fiehr de Gliggsbilze sein däde! Isch däde gahr nisch anders könn, als wie misch unnor de Gliggschderne zu sonnen. Das dud doch sähr bosedief kling, hä?

Sie meen, Schderne dun nisch so sähr viel Sonnenschein hervorrufn?

Hm, schdimmd - von Schdernenschein had sisch noch keenor een Sonnenbrand gehold! Un währ sisch im Schdernenschein sonn dud, dähr kann sisch ooch in de scheensdn Sommornäschde leisched

vorkiehn. Un unnor dähm Schein dor Gliggsschderne wird das nisch viel annersch sein. Schdadd  
Urlaubsbräune holsde dir heeschdens een Schnubbn.

So gesähn is mei Horrorgob - fiehr misch als Fisch - gar nisch so sähr ginsdisch. Un dann is da  
ooch noch die Bassasche, wo drinne schdehn dud, dass de Bardnorschafd eischendlich ganz brima  
loofn dud, dass isch misch abor nisch wundorn soll, wenn dennoch bald e neuor Lieblingsmensch  
vor dor Diere schdehn dud. Was soll denne das heeßn? E neuor Lieblingsmensch? Meen die  
jemand, dähr mir noch liebor sein däde, als wie meine Gudste???

Nee, das kann isch mir nisch vorschdeln! Jemand, dähr mir mir noch liebor...- nee, da däde mir  
meine Gudste abor was erzähl! Nisch lange, un die hädde mir jegliche Simbadhie geeschnibor  
eenor andorn Berson ausgereded, um nisch zu sachn - mir ausm Kobb geschlachn!

Un zum annorn - währ söllde denne das ooch sein - dähr neue Lieblingsmensch vor dor Diere? Eene  
neue Gudste? Odor... - nee, Geldbriefdräschor duds ja nisch mähr gähm! Odor irschend so e  
Vordrähdor fiehr Schdaubsauchor? Nee! Heeschdens - isch krisch een neun Enkl! Guhd, das däde  
eene realisdische Meeschlichkeed sein. Un da däde ja dann ooch meine Gudste e Ooche zudriggn!

**Eduard Sachsenmeyer**